開放文學 -- 歷代筆記 -- 夜雨秋燈錄 吳門張少卿校書花燭詞並序

吳門名校書張少卿者,係出毗陵間,小家之碧玉。身依慧水,托雅集於黃。聽兩僧廬,夢雲禪榻。深情款曲,綺語纏綿。早已游侶名,癡人逐隊矣。無何,跡附鸞燈,歌傳雀舫。虎邱春暖,蕩駕夢而低昂;鶴市齊深,聽弦而掩抑。嗣以金吾禁切,玉女藏蹤。深潛於桃李園中,久匿於芰荷叢裡。琵琶小撥,檀板輕敵。卷花之鯨浪雖狂,蔭葉之鶯身自穩。迨乎風姨威息,月姊恩多,結小社於紅樓,試新聯於翠帖。(自注:有巨公贈以聯曰:「少之時不亦樂乎;卿以下何足算也。」)門前車馬,巷里笙歌,時蓋居乾將坊巷也。燈紅酒綠之場,非卿不樂;月地花天之下,與子為歡。斷三生杜牧之場,名流傾倒;作一夕秦宮之夢,我輩勾留。乃有張小尹觀察者,筮仕滇池,羈身滬瀆。近復以奉催軍糈,解橐吳閶。問柳章台,品花吳市。緣深一面,遽爾銷魂;夢結連宵,翕然意滿。詞托微波之達,好倩蹇修;鑒忘禍水之臨,敢稱副室。爰訪委禽之禮,用圖比翼之歡。遂於月之□六日,迎歸於曹家巷寓廬。紅交拜,金盞同傾,禮也。藍橋重度,看蟬鬢之斜欹;玉札誰緘,顧鸞弦之再奏。聊疏短引,兼附新詩,藉佐奇談,以供一噱云爾。詞云:卸卻黃冠畫翠眉,靚妝顧影弄嬌姿。無端一夕東君力,博得雍容象服宜。姐妹常時共倚樓,尊前老大各生愁。紅顏畢竟多濃福,夫婿居然在上頭。七寶香車錦作堆,彩旗繡織兩行開。旁人休與爭遲疾,八座巍然命婦來。黃紙新緘御筆封,入門便荷寵光隆。而今休說梁紅玉,合向先生拜下風。舊日棲遲王謝堂,新巢京兆有雕樑。不須更說烏衣巷,飛入高枝變鳳凰。記得歡場手共攜,女牀鸞鳳換巢棲。琵琶還向江心弄,笑爾潯陽估客妻。大弦急迫小弦舒,合巹青廬事不虛。願得多情似關盼,深樓常伴老尚書。濃豔凝妝倚晚霞,一枝移植到仙家。蘇台春色知何許,多少王孫不看花。

此夢蕪庵主稿也。敘事周詳,言情婉約,而弦外傳音,更覺有餘不盡,是真得風人之旨者矣。